

11/05/1999

Belia perlu faham dasar kerajaan

KUALA LUMPUR, Isnin - Datuk Seri Dr Mahathir Mohamad, hari ini meminta belia mempertahankan kedaulatan dan keharmonian negara dengan memahami segala dasar yang dilaksanakan kerajaan.

Belia juga diingatkan supaya tidak mudah terpengaruh dengan budaya negatif di sesetengah negara, yang pemimpinnya hanya mementingkan populariti.

Perdana Menteri membuat saranan itu pada pertemuan tertutup dengan lebih 100 pemimpin belia yang mewakili 20 persatuan dari seluruh negara, di Pusat Dagangan Dunia Putra (PWTC) di sini, hari ini.

Pada pertemuan itu, Dr Mahathir menekankan kerajaan tidak mementingkan populariti, sebaliknya menumpukan kepada pembangunan negara untuk kesejahteraan rakyat.

Menteri Belia dan Sukan, Tan Sri Muhyiddin Yassin, memberitahu pemberita selepas pertemuan itu, pemimpin belia yang hadir menyambut baik penjelasan Dr Mahathir serta menyokong usaha pemulihan ekonomi negara.

"Malah, pemimpin belia berikrar melaksanakan saranan Perdana Menteri agar sistem demokrasi dipertahankan dan mereka tidak terpengaruh dengan gejala negatif yang boleh menggugat kemakmuran negara," katanya.

Antara persatuan yang hadir ialah Majlis Belia Malaysia (MBM); Majlis Belia Felda; Majlis Belia Negeri; Gabungan Pelajar Melayu Semenanjung (GPMS); Persatuan Pengakap Malaysia; Gerakan Belia 4B serta persatuan mahasiswa institusi pengajian tinggi tempatan.

Pada pertemuan kira-kira dua jam itu, Perdana Menteri turut menjawab soalan yang dibangkitkan peserta mengenai isu semasa.

"Inilah kali pertama pemimpin belia mendengar penjelasan langsung Perdana Menteri dan tepukan gemuruh selepas sesi perjumpaan ini adalah bukti mereka menerima baik penjelasan berkenaan," kata Muhyiddin.

Beliau berkata, Perdana Menteri juga bersetuju merasmikan sambutan Hari Belia Negara, Sabtu ini selaras usaha kerajaan mewujudkan hubungan lebih akrab dengan pertubuhan belia.

(END)